




中國大政治家

782.1

1



拔提書店印行

自序

自余初知學卽服膺王荊公欲爲作傳也有年牽於他業本克就頃修國史至宋代欲考熙豐新法之真相窮極其原因結果鑑其利害得失以爲知來視往之資而詞諸先史則漏略蕪雜莫知其紀重以入主出奴護辭溢惡虛構事實所在矛盾於是發憤取臨川全集再四究索佐以宋人文集筆記數十種以與宋史諸志諸傳相參證其數百年來哲人碩學之言論足資徵信者稽而讀之亦得十數家鉤稽甲乙衡量是非然後歎吾疇昔自謂能知荊公能尊荊公者無以異於酌潢濟之水而以知爲海觀甕牖之明而以爲知天下而流俗之詆譏荊公污蔑荊公者益無以異於斥鷃之笑鵬蜺蜉之撼樹也不揣寡陋筆以成此編非欲爲過去歷史翻一場公案凡以示偉人之模範庶幾百世之下有聞而興起者乎則區區搜討之勤爲不虛也新會梁啟超

例言

一本書以發揮荆公政術爲第一義故於其所創諸新法之內容及其得失言之特詳而往往以今世歐美政治比較之使讀者於新舊知識咸得融會

一宋史記熙豐事實者成於南渡以後史官之手而元人因而襲之皆反對黨之言不可徵信今於其污鑷荆公處皆一一詳辯之別爲考異若干條

一荆公不僅爲中國大政治家亦爲中國大文學家故於其詩文采錄頗多其散見於前各章者皆與政治有關係者也其僅足爲文章模範者亦損十數首錄入末二章使讀者得緣此以窺全豹

一屬稿時所資之參考書不下百種其取材最富者爲金谿蔡元鳳先生之王荆公年譜先生名上翔乾嘉間人學問之博瞻文章之淵懿皆爲近世所罕見所著年譜凡二十五卷雜錄二卷成書時年已八十有八蓋畢生精力瘁於是矣其有流傳極少書而人亦不見稱於並世士大夫殆不求聞達之君子耶爰誌數語以諗史官

一本書行文信筆而成不復覆視蕪衍疏略自知不免尙希海內方聞之士有以教之

著者識

目次

- 第一章 敘論
- 第二章 荆公之時代（上）
- 第三章 荆公之時代（下）
- 第四章 荆公之略傳
- 第五章 執政前之荆公（上）
- 第六章 執政前之荆公（中）
- 第七章 執政前之荆公（下）
- 第八章 荆公與神宗
- 第九章 荆公之政術（一）總論
- 第十章 荆公之政術（二）民政及財政
- 第十一章 荆公之政術（三）軍政
- 第十二章 荆公之政術（四）教育及選舉
- 第十三章 荆公之武功
- 第十四章 罷政後之荆公

中國六大政治家

二

第十五章 新政之成績

第十六章 新政之沮撓及破壞（上）

第十七章 新政之沮撓及破壞（下）

第十八章 荆公之用人及交友

第十九章 荆公之家庭

第二十章 荆公之學術

第二十一章 荆公之文學（上）

第二十二章 荆公之文學（下）

第一章 敘論

國史氏曰。甚矣知人論世之不易易也。以余所見宋太傅荆國王文公安石。其德量汪然若千頃之陂。其氣節嶸然若萬仞之壁。其學術集九流之粹。其文章起八代之衰。其所設施之事故。適應於時代之要求而救其弊。其良法美意。往往傳諸今日。莫之能廢。其見廢者。又大率皆有合於政治之原理。至今東西諸國行之而有效者也。嗚呼。皋夔伊周。邈哉邈乎。其詳不可得聞。若乃於三代下求完人。惟公庶足以當之矣。悠悠千稔。間生偉人。此國史之光。而國民所當買絲以繡鑄金以祀也。距公之後。垂千年矣。此千年中。國民之視公何如。吾每讀宋史。未嘗不廢書而慟也。

以不世出之傑。而蒙天下之詬。易世而未之溺者。在泰西則有克林威爾。而在吾國則有荆公。泰西鄉原之史家。其論克林威爾也。曰亂臣。曰賊子。曰奸險。曰兇殘。曰迷信。曰發狂。曰專制。曰偽善者。萬喙同聲。牢不可破者殆百年。顧及今而是非大白矣。英國國會先哲畫像數百通。其巍然首座者則克林威爾也。而我國民之於荆公則何如。吠影吠聲以醜詆之。舉無以異於元祐紹興之時。其有譽之者。不過賞其文辭。稍進者。亦不過嘉其勇於任事。而於其事業之宏遠而偉大。莫或見及。而其高尚之人格。則益如良璞之韞於深礦。永劫莫發其光晶也。嗚呼。吾每讀宋史。未嘗不廢書而慟也。

曾文正謂宋儒寬於責小人而嚴於責君子。嗚呼。豈惟宋儒。蓋此毒深中於社會。迄今而日加甚焉。孟子惡求全之毀。求全云者。於善之中必求其不善者云爾。然且惡之。從未有盡沒其善而虛構無何有之惡以相誣毀者。其有之。則自宋儒之詆荆公始也。夫中國人民。以保守爲天性。遵無動爲大之教。其於荆公之赫然設施。相率驚駭而沮之良不足爲怪。顧政見自政見。而人格自人格也。獨奈何以政見之不合。黨同伐異。莫能相勝。乃架虛辭以譏人私德。此村嫗相諍之窮技。而不意其出於賢士大夫也。遂養成千年來不黑不白不痛不癢之世界。使光明俊偉之人無以自存於社會。而舉世以學鄉原相勸勉。嗚呼。吾每讀宋史。未嘗不廢書而長慟也。

吾今欲爲荆公作傳。而有最窘余者一事焉。曰宋史之不足信是也。宋史之不足信。非吾一人私言。有先我言之者數君子焉。數君子者。其於荆公可謂空谷之足音。而其言宜若可以取信於天下。又孟子所謂汗不至阿其所好者也。今首錄之以志羈比之誠。

陸象山先生（九淵）荆國王文公祠堂記曰。

（前略）昭陵之日。使還獻書。指陳時事。剖悉弊端。枝葉扶疏。往往切當。公疇昔之學問。熙寧之事業。舉不遁乎使還之書。而排公者。或謂容悅。或謂迎合。或謂變其所守。或謂乖其所學。是尙得知公者乎。英邁特往。不屑於流俗聲色利達之習。介然無毫毛得以入於其心。潔白之操。寒於冰霜。公之質也。掃俗學之凡陋。振弊法之因循。道

術必爲孔孟。勲績必爲伊周。公之志也。不期人之知。而聲光爆奔。一時鉅公名賢。爲之左次。公之得此。豈偶然哉。用逢其時。君不世出。學焉而後臣之。無愧成湯高宗。公之得君。可謂專矣。新法之議。舉朝譴譴。行之未幾。天下恟恟。公方秉執周禮。精白言之。自信所學。確乎不疑。君子力爭。繼之以去。小人投機。密變其決。忠樸屏伏。僉狃得志。曾不爲悟。公之蔽也。熙甯排公者。大抵極詆訾之言。而不折之以至理。平者未一二。而激者居八九。上不足以取信於裕陵。下不足以解公之蔽。反以固其意成其事。新法之罪。諸君子固分之矣。元祐大臣。一切更張。豈所謂無偏無黨者哉。所貴乎玉者。瑕瑜不相掩也。古之信史。直書其事。是非善惡。靡不畢見。勸懲鑑戒。後世所賴。抑揚損益。以附己好惡。用失情實。小人得以藉口而激怒。豈所望於君子哉。（中略）近世學者。雷同一律。發言盈庭。又豈善學前輩者哉。公世居所川。罷政徙於金陵。宣和間故廬邱墟。鄉人屬縣。立祠其上。紹興初常加葺焉。逮今餘四十年。墮圯已甚。過者咨歎。今怪力之祠。綿綿不絕。而公以蓋世之英。絕俗之操。山川炳靈。殆不世有。其廟貌不嚴。邦人無所致敬。無乃議論之不公。人心之畏疑。使至是耶。（後略）

顏習齋先生（元）宋史評曰。

荆公廉潔高尚。浩然有古人正己以正天下之意。及旣出也。慨然欲堯舜三代其君。所行法如農田保甲保馬雇役方田水利更戍置弓箭手於鴈河。皆屬良法。後多踵行。卽當時至

元祐間。范純仁李清臣彭汝礪等。亦訟其法以爲不可盡變。惟青苗均輸市易。行之不善。易滋弊竇。然人亦會考當日之時勢乎。太宗北征中流矢。二歲創發而卒。神宗言之。惓焉流涕。夏本宋叛臣而稱帝。此皆臣子所不可與共戴天者也。二歲輸遼夏金一百二十五萬五千兩。其他慶弔聘問賂遺近幸又倍。宋何以爲國。求其容我爲君。宋何以爲名。又臣子所不可一日安者也。而宋欲舉兵則兵不足。欲足兵餉又不足。荆公爲此。豈得已哉。譬之仇讎。戕吾父兄。吾急與之訟。遂至數責家貲。而豈得已哉。宋人苟安已久。聞北風而戰栗。於是墻堵而進。與荆公爲難。極詬之曰。奸曰邪。並不與之商榷可否。或更有大計焉。惟務使其一事不行立見驅除而後已。而乃獨責公以執拗可乎。且公之施爲。亦彰彰有效矣。用薛向張商英等治國。用王韶熊本等治兵。西域吐蕃。南平洞蠻。牽夏人五十二砦。高麗來朝。宋幾振矣。而韓琦富弼等必欲沮壞之。毋乃荆公當念君父之讎。而韓富司馬等皆當恕置也乎。矧琦之劾荆公也。其言更可怪笑。曰致敵疑者有七。一抬高麗朝貢。一取吐蕃之地建熙河。一梳榆柳於西山以制蕃騎。一創團保甲。一築河北城池。一置都作院頒弓矢新式大作戰車。一置河北三十七將。皆宜罷之以釋其疑。嗟乎。敵惡吾備則去備。若敵惡吾有首將去首乎。此韓節夫所以不保其元也。且此七事皆荆公大計。而史半削之。幸琦誤以爲罪狀遂傳耳。則其他削者何限。范祖禹黃庭堅修神宗實錄。務詆荆公。陸佃曰。此謗書矣。旣而蔡下重行刊定。元祐黨起。又行盡改。然

則宋史尙可信邪。其指斥荆公者是邪非邪。雖然。一人是非何足辨。所恨誣此一人。而遂君父之讎也。而天下後世。遂羣以苟安頽靡爲君子。而建功立業欲撐拄乾坤者爲小人也。豈獨荆公之不幸宋之不幸也哉。

至近世則有金谿蔡元鳳先生（上翔）殫畢生之力。爲王荆公年譜考略。其自序曰。

（前略）君子疾沒世而名不稱焉。則凡善有可紀。惡有當禡。不出於生平事實。而後之論者。雖或意見各殊。褒貶互異。然事實固不可得而易也。惟世之論公者則不然。公之沒去今七百餘年。其始肆爲詆毀者。多出於私書。旣而采私書爲正史。此外事實愈增。欲辨尤難。（中略）憶公有上韶州張殿丞書。其言曰。「自三代之時。國各有史。而當時之史。多世其家。往往以身死職。不負其意。蓋其所傳。皆可考據。後旣無諸侯之史。而近世非尊爵威位。雖雄奇傷烈。道德流衍。不幸不爲朝廷所稱。輒不得見於史。而執筆者又雜出一時之貴人。觀其在廷論議之時。人人得講其然否。尙或以忠爲邪。以異爲同。誅當前而不慄。訕在後而不羞。苟以譽其急好之心而止耳。況陰挾翰墨以裁前人之善惡。疑可以貸褒。似可以附毀。往者不能訟當否。生者不得論曲直。賞罰謗譽。又不施其間。以彼其私。獨安能無欺於冥昧之間耶。」嗚呼。盡之矣。此書作於慶歷皇祐間。當是時公已見稱於名賢鉅公。而未嘗有非毀及之者也。然每讀是書。而不禁歎歎累歎。何其有似後世詆公者。而公已先言之也。自古前代育史。必由繼世者修之。而其所考據

。則必有所自來。若爲宋史者元人也。而元人盡采私書爲正史。當熙寧新法初行。在朝議論蠱起。其事實在新法。猶爲有可指數者。及夫元祐諸臣秉政。不惟新法盡變。而黨禍蔓延。尤在范呂諸人初修神宗實錄。其時邵氏聞見錄。司馬溫公瑣語凍水紀聞。魏道輔東軒筆錄。已紛紛盡出。則皆陰挾翰墨以鑿其忿好之私者爲之也。又繼以范冲朱墨史。李仁甫長編。凡公所致憾於往者不能訟當否。生者不得論曲直。若重爲天下後世惜者。而不料公以一身當之。必使天下之惡皆歸。至謂宋之亡由安石。豈不過甚已哉。宋自南渡至於元。中間二百餘年。肆爲詆毀者。已不勝其繁矣。由元至明中葉。則有若周德恭。謂神宗合赧亥桓靈爲一人。有若楊用修。斥安石合伯繇商鞅莽操懿溫爲一人。抑又甚焉。又其前若蘇子瞻作溫國行狀。至九千四百餘言而詆安石者居其半。無論古無此體。卽子瞻安得有如是之文。後則明有唐應德者。著史纂左編。傳安石至二萬六千五百餘言。而亦無一美言一善行。是尙可與言史事乎哉。（後略）

陸顏兩先生。皆一代大儒。其言宜若可信。而蔡氏者又博極羣書。積數十寒暑之日。力網羅數千卷之資料以成年譜。而其持論若此。然則居今日以傳荆公。欲求如克林威爾所謂「晝我當畫似我者。」不亦憂憂乎至難之業哉。雖然。以歷史上不一二見之哲人。匪直盛德大業。淹沒不章。抑且千夫所指。與禹鼎之不若同視。天下不復有真是非。則禍之中於世道人心者。將與洪水猛獸同烈。則夫爾朴說拒淫辭。揚潛德發幽光。上酬先民。下獎來哲。爲事雖難。

，烏可以已。是則茲編之所由作也。

（附）宋史私評

宋史在諸史中。最稱蕪穢。四庫全書提要云。「其大旨以表章道學爲宗。餘事不甚措意。故舛謬不能殫數。」檀氏（萃）曰。「宋史繁猥既甚。而是非亦未能盡出於大公。蓋自洛蜀黨分。迄南渡而不息。其門戶之見。錮及人心者深。故比同者多爲掩飾之言。而離異者未免指摘之過。」此可謂深中其病矣。其後柯維騏著宋史新編。沈世泊著宋史就正編。皆糾正其謬。四庫提要摘其紀志互異處。傳前後互異處。十餘條。趙氏（翼）陔餘叢考。廿二史劄記。摘其敘事錯雜處。失檢處。錯謬處。遺漏處。牴牾處。各十餘條。其各傳迴護處。附會處。是非失當處。是非乖謬處。共百餘條。則是書之價值。概可見矣。

而其舛謬最甚。而數百年來未有人起而糾之者。莫如所記關於王荊公之事。故欲宋史成於元人之手。元人非有所好惡於其間也。徒以無識不能別擇史料之真僞耳。故欲辨宋史當先辯其所據之資料。考宋時修神宗實錄。聚訟最紛。幾興大獄。元祐初。范祖禹黃庭堅陸佃等同修之。佃數與祖禹庭堅爭辯。庭堅曰。如公言。蓋佞史也。佃曰。如君言。豈非謗書乎。佃雖學於荊公。然不附和薪法。今其言如此。則最初本之神宗實錄。誣罔之辭已多。可以見矣。是爲第一次之實錄。及紹聖改元。三省同進呈臺諫前後章疏。言實錄院前後所修先帝實錄。類多附會姦言。詆熙豐以來政事。及國史院取范祖禹

趙彥若黃庭堅所供文狀。各稱別無按據得之傳聞事。上曰。文字以盡見。史臣敢如此誕慢不恭。章惇曰。不惟多稱得於傳聞。雖有臣僚家取到文字。亦不可信。但其言以傳聞修史。欺誣敢如此。安燾曰。自古史官未有如此者。亦朝廷不幸。此雖出於反對元祐者之口。其言亦不無可信。前此蔣之奇劾歐陽修以帷薄事。修屢抗疏乞根究。及廷旨詰問之奇。亦僅以傳聞了之。可知宋時臺館習氣。固如是也。於是有詔命蔡卞等重修實錄。卞取荆公所著熙寧日錄以進。將元祐本塗改甚多。以朱筆抹之。號朱墨本。是爲第二次之實錄。而元祐諸人。又攻之不已。徽宗時。有劉正夫者。言元祐紹聖所修神宗史。互有得失。當折衷其說。傳信萬世。又有徐勣者。言神宗正史。今更五閏。未能成書。蓋由元祐紹聖史臣。好惡不同。范祖禹等專主司馬光家藏記事。蔡京兄弟純用王安石日錄。各爲之說。故論議紛然。當時輔相之家。家藏記錄。何得無之。臣謂宜盡取用。參訂是非。勒成大典。於是復有詔再修。未及成而靖康之難作。南渡後。紹聖四年。范冲再修成之以進。是爲第三次之實錄。宋史所據。卽此本也。自紹聖至紹興。元祐黨人。竄逐顛播者凡三十餘年。深怨積憤。而范冲又爲祖禹之子。繼其父業。變本加厲以恣報復。而荆公自著之日錄。與紹聖間朱墨本之實錄。悉從燬滅。無可考見。宋史遂據一面之詞。以成信讞。而沈寃遂永世莫白矣。凡史中醜詆荆公之語。以他書證之。其誣讖之跡。確然可考見者十之六七。近儒李氏（紱）蔡氏（上翔）辨證甚博。吾將摘其重要者。分載

下方各章。茲不先贅。要之欲考熙豐事實。則劉正夫徐勣所謂元祐紹聖好惡不同互有得失者。最爲公平。吾非敢謂紹聖本之譽荆公者。遂爲信史。然如元祐紹興本欲以一手掩盡天下目。吾雖欲無言。又烏可得也。蔡氏所撰荆公年譜。戴靖康初楊時論蔡京疏。有南宋無名氏則書其後云。

荆公之時。國家全盛。熙河之捷。擴地數千里。開國百年以來所未有者。南渡以後。元祐諸賢之子孫。及蘇程之門人故吏。發憤於黨禁之禍。以攻蔡京爲未足。乃以敗亂之由。推原於荆公。皆妄說也。其實徵欽之禍。由於蔡京。蔡京之用。由於溫公。而龜山之進。又由於蔡京。波瀾相推。全與荆公無涉。至於龜山在徽宗時。不攻蔡京而攻荆公。則感京之恩。畏京之勢。而欺荆公已死者爲易與。故舍時政而追往事耳。（後略）

此其言最爲洞中癥結。荆公所以受誣千載而莫能白者。皆由元祐諸賢之子孫及蘇程之門人故吏。造爲已甚之詞。及道學旣爲世所尊。而蜚語遂變鐵案。四庫提要推原宋史舛謬之故。由於專表章道學。而他事不措意。誠哉然矣。顏習齋又嘗爲韓侂胄辯冤。謂其能仗義復仇。爲南宋第一名相。宋人誅之以謝金。實狗彘不如。而宋史以入之奸臣傳。徒以其得罪於講學諸君子之故耳云云。朱竹垞王漁洋皆論張浚誤國。其殺罪端與秦檜之殺岳飛無異。徒因浚有子講學且爲朱子所父事。遂崇之爲名臣。而文致曲端有可殺之罪。

實爲曲筆云云。凡此皆足證宋史顛倒黑白變亂是非之處。不一而足。而其大原因則皆由學術門戶主奴之見。有以蔽之。若荆公又不幸而受認最烈者也。吾故先評之如此。吾言信否。以俟識者。

第二章 荆公之時代（上）

自有史以來。中國之不競。未有甚於宋之時者也。宋之不競。其故安在。始焉起於太祖之猜忌。中焉成於眞仁之泄沓。終焉斷送於朋黨之擠排。而荆公則不幸而丁夫其間。致命遂志以與時勢抗。而卒未能勝之者也。知此則可與語荆公矣。

宋藝祖之有天下。實創前史未有之局。何以言之。昔之有天下者。或起藩封。或起草澤。或以征誅。或以篡禪。周秦以前。其爲天子者。大率與前代之主俱南面而治者數百年。不必論矣。乃若漢唐之興。皆承大亂之餘。百戰以剪除羣雄。其得之也甚艱。而用力也甚巨。次則曹操劉裕之儔。先固嘗有大功於天下。爲民望所繫。卽等而下之。若蕭道成蕭衍輩。亦久立乎人之本朝。處心積慮以謀此一席者有年。羽翼已就。始一舉而覆之。惟宋不然。以區區一殿前都檢點。自始未嘗有赫赫之功也。亦非敢蓄異志覬非常也。陳橋之變。醉臥未起。黃袍已加。奪國於狐兒姦婦手中。日未旰而事已畢。故其初誓諸將也。曰。「汝等貪富貴。立我爲天子。我有號令。汝等能果乎。」蓋深憚之之詞也。由此觀之。前此之有天下者。其得之

皆以自力。惟宋之得之以他力。夫能以他力取諸人以予我者。則亦將能以他力奪諸我以予人。藝祖終身所惴惴者。惟此一事。而有宋積弱之大原。皆基於是矣。

以將士擁立天子。創於宋。以將士劫天子而擁立主帥。則不起於宋而起於唐。唐代諸藩鎮之有留後也。皆陳橋之先聲。而陳橋之役。不過因其所習行者加之厲而已。夫廢置天子而出於將士之手。其可畏固莫甚焉。卽不然。而將士常得有所擁以劫天子。則宋之爲宋。固不能一日而以卽安。宋祖有忱於此。故篡周以後。他無所事。而惟以弱其兵弱其將爲事。夫藩鎮之毒天下。垂二百年。摧陷而廓清之。

孰云非當。然誼辟之所以處此。必將有道矣。導之以節制。而使之爲國家捍城。古今中外之有國者。未聞有以兵之強爲患者也。宋則不然。汲汲焉務弱舉國之民。以強君主之一身。曾不思舉國皆弱而君主果何術以自強者。宋祖之言曰。臥榻之側。豈容他人鼾睡。而不計寢門之外。大有人圖僂焉。夫宋祖之所見。則限於臥榻而已。此宋之所以爲宋也。

漢唐之創業也。其人主皆有統一宇內澄清天下之遠志。宋則何有焉。五季諸鎮。其芟夷削平之功。強坐在周世宗。宋祖乃晏坐而收其成。所餘江南蜀粵。則其君臣弄文墨恣嬉游。甚者淫虐是逞。人心解體。兵之所至。從風而靡。其亡也。乃其自亡。而非宋能亡之也。而北有遼。西有夏。爲宋室百年之患者。宋祖未嘗一留意也。謂是其智不及歟。殆非然。彼方汲汲於弱中國。而安有餘力以及此也。

自石敬瑭割燕雲十六州以賂契丹。爲國史前此未有之恥辱。及周世宗。幾雪之矣。顯德六年。三關之捷。契丹落膽。使天假世宗以期年之壽。則全燕之光復。意中事也。卽陳橋之役。其發端固自北伐。其時將士相與謀者。固猶先立檢點爲天子然後出征也。使宋祖能乘契丹凋敝震恐之時。用周氏百戰之兵以臨之。劉裕桓溫之功。不難就也。旣不出此。厥後曹翰獻取幽州之策。復以趙普一言而罷。夫豈謂幽州之不當取不可取。懼取之而唐代盧龍魏博之故轍將復見也。(王船山宋論之言如此。可謂知言。)自是以後。遼遂得夜郎自大以奴畜宋人。太宗北伐。傾國大舉。而死傷過半。帝中流矢。二歲而創潰以崩。乃益務寢兵。惟戢首帖耳。柔索敵賦以供歲幣。眞宗澶淵之役。王欽若請幸江南。陳堯叟請幸蜀。使非有寇萊公。則宋之南渡。豈俟紹興哉。然雖有一萊公。而終不免於城下之盟。至仁宗時。而歲幣增於前者又倍。遼之病宋也若此。

李氏自唐以來。世有銀夏。阻於一方。服食仰給中國。翹首而望內屬之日久。及河東旣下。李繼捧遂來歸。旣受之使移鎮彰德。苟乘此時。易四州之帥。選虎臣以鎮撫之。鼓勵其吏士而重用之。旣可以斷契丹之右臂。而久任之部曲。尙武之邊民。各得效其材勇以圖功名。宋自此無西顧憂矣。乃太宗趙普。襲藝祖之故智。誓不欲以馬肥士勇鹽池沃壤付諸矯矯之臣。坐令繼遷叛歸。而復縱繼捧以還故鎮。徒長寇而示弱。故繼捧北附於契丹。繼遷且僞受投以緩敵。及元昊起。而帝制自雄。虔劉西土。不特掣中國而使之不得不屈於北狄。乃敢援例以